

Date – 31/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram Chief Secretary hna chelh lailawk turin Pu H. Lalengmawia, IAS chu ruat a ni a, vawiin atangin a hna a thawk tan ang.
2. Chief Minister Pu Lalduhoma'n natna thar hrang hrang tam chho zelah damdawi lama mithiam bikte mamawhna a sang zel, a ti.
3. Thirsakawr hmanga kawng thui tak intlansiakna Tour de Hmuifang chu tukin khan Tourism Minister Pi Lalrinpuii chuan Vanapa Hall kawt atangin a vai liam.
4. Civil Aviation Minister K Ram Mohan Naidu chuan New Delhi-a Rajiv Gandhi Bhawan-a Medical Inspection Room chu biak hmuhtheihna kaltlangin a hawng.

<><><>

CHIEF SECRETARY

Mizoram sorkar hnuaiia Chief Secretary Pi Renu Sharma, IAS chu a hna thawh hun a lo zawh tak a vangin a hmun ruak luah tur ruat a ni a, Chief Secretary hna lo thawk lailawk turin Pu H. Lalengmawia, IAS (AGMUT:2005) chu ruat lailawk a ni.

Mizoram sokar thuchhuah tarlan dan chuan Pu H. Lalengmawia hian vawiin October 31, Ningani atang hian a hna hi a thawk tan ang a, thupek thar a chhuah leh hma chuan a thawk chhunzawm ang. Pu H. Lalengmawia hian Mizoram sorkar hnuaiiah Environment, Forest & Climate Change, Higher & Technical bakah Fisheries Department hnuaiiah Secretary hna a thawk mek a, a hna pangngai bakah hian Chief Secretary hna hi a hmoi tel nghal dawn a, a hlawah erawh danglamna a awm tel lo ang.

<><><>

CM AT ZMC

Chief Minister Pu Lalduhoma'n natna thar hrang hrang tam chho zelah damdawi lama mithiam bikte mamawhna a sang zel, a ti.

Niminna Zoram Medical College (ZMC), Falkawna Curie Ladies Hostel leh post-graduate course thar, Master of Public Health course a hawnaah he thu hi a sawi a.

Chief Minister chuan Zoram Medical College-a hostel thar leh course thar hawn a ni chu Mizoram tan thil chhinchhiahtlak tak a ni, a ti a. Chief Minister chuan post graduate course hawn tak chuan nasa takin

natna hrang hrang tihdam hnaah a puih a beisei thu a sawi a. ZMC enkawltute chu an hnathawh that avanga lawmthu hrilhin ruhrela hmasawna chauh ni lo, inpekna nena hma la chhonzawm zel turin a chah a. ZMC chu sorkarin kil tinah a ngaihsak zel dawn tih Chief Minister chuan sawiin ZMC hnathawktuteah sorkar ta leh society ta an awm hran a, hei hi sorkar ta ni vek turin hma an la a, hemi atan hian cabinet memorandum buatsaih a ni tawh a; Cabinet meeting hmasa berah tihfel a ni ang, a ti a. National Medical Commission atanga ZMC-in fakna a dawng chuan ZMC zirna that zia a tilang chiang hle tih a sawi bawk.

Chief Minister chuan hmeichhe hostel thar avang hian a hmaa hmeichhe tana hostel-a seat 202 awm chu seat 282-ah a kai chho tawh dawn a ni, a ti a. Nakina ram tana mi pawimawh tur zirlai hmeichhiate ngaihsaka enkawl a pawimawh hle tih sawiin hostel thar pawh chu lehkha zirna atana an mamawh leh an zir chhunga an chenna tur tha ngaihtuhsakna hna pawimawh tak a ni, a ti a. ZMC-in mamawh an neiha an koh hun apianga chhang turin sorkar chu a inkau reng a ni, a ti bawk.

<><><>

TOUR DE HMUIFANG

Thirsakawr hmanga kawng thui tak intlansiakna Tour de Hmifang chu tukin khan tlan tan a ni a, a bul tanna chu Aizawl Vanapa Hall kawt atanga neih niin Tourism Minister Pi Lalrinpuii chuan a vailiam.

Pi Lalrinpuii chuan khawvel hmun hrang hrangah thirsakawr hmanga intlansiak leh taksa sawizawi chu an uarin a hrisel tih a sawi a, Mizoram mai bakah state hrang hrang – Manipur, Meghalaya leh Bengaluru atanga lo kalte chu chibai bukin, intlansakna tha leh hlawhtling tak nei turin duhsakna a hlan. Tourism Minister hian mitin te chu mahni thlen phak tawh china theihtawp chhuah tur a chahin. Theihtawp an chhuah chuan an thil tihna kawngah hnehna changtu an ni thin tih a sawi bawk.

Akashvani News, Aizawl chuan Mizoram Cycling Association General Secretary Pu Lalrinfela hnen atangin hetiang hian report a dawng.

Tun tum Tour de Hmuifang hi a vawi lina niin, kum dang ang bawkin Environment humhim leh Tourism tih hmasawn tum nana buatsaih a ni.

<><><>

MZP

Mizo Zirlai Pawl (MZP) hmalaknain Mizoram chhunga document lem siamtu ni ngeia hriat mi pakhat man a ni.

MZP chuan nimina an thuchhuahah Mizoram chung ngeiah certificate leh document lem hrang hrang siam a tam hlea an hriat thu an sawi a. Hei hi Mizoram tan leh zirlaite tana thil pawl tak a nih theih dawn avangin tihtawp a nih theih nan hma an la nghal tih an sawi a, document lem siamtu ni ngeia hriat mi pakhat man nghal a ni, an ti.

MZP chuan tun hnaiah certificate leh document lem siam an awm ngei nia a hriat avangin uluk takin a chhui zui nghal tih an sawi a. Document hrang hrang - Educational certificate (pawl sarih atanga a chunglam zawng), Birth certificate, Driving License, Professional Certificate (B.Ed., D.El.Ed. leh a dangte) chu timna nei hauh lovin a lem siam chhuak an awm ngeia an hriat thu an sawi a. An finfiah hnuah dan anga hmalak a nih theih nan Home Minister Pu K. Sapdanga an sawipui nghalin hma la turin an ngen tih an sawi a. Home Minister chuan chak taka bawhzui nghalin certificate lem siamtu ni ngeia hriat mi pakhat chu tunah hian Police ten an man tawh tih an sawi a ni.

MZP chuan Home Minister-in chak taka hma a laknaah lawmthu sawiin zirlaiten hun leh tha tam tak senga certificate an sual chhuah laia awlsam taka certificate leh document lem hrang hrang Mizoramah ngei ngampa taka siam chhuah a ni chu pawl an tih thu leh an dodal tlat thu an sawi a. Hetiang thil a awm tawh loh nan chak taka hmala turin Mizoram sawrkar an ngen nawn tih sawiin MZP pawhin uluk takin a enzui zel dawn a ni, an ti.

<><><>

GIRI GHARTI

Kar kalta Thawhlejni October 22 atanga chin hriat loh a bo Kolasib Tumpui venga cheng Tv. Giri Gharti (Bawtre-a, kum 50) ruang chu nimin tlai dar 4 vel khan hmuh a ni.

Tv. Giri Gharti-a ruang hi Kolasib Venglaia Pu Lalrotluanga In sak laiah chhar a ni a, a ruang hi nizan khan Hindu dan in hal ral a ni. Tv Giri Gharti hi Gorkha tlangval niin Autorickshaw khalha ei zawng thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theiha dah a ni

<><><>

MIZORAM STATE POLICY COORDINATION COMMITTEE

Mizoram State Policy Coordination Committee (MSPCC) chuan Bana Kaih Scheme kal mekah Taxi (2-wheeler, 4-wheeler leh autorickshaw) atana dilna chu Handholding Scheme-in a huam tel loh thu an sawi.

Nimin khan MSPCC hi thu khawmin department thenkhat hnuaia dilna lutte an ngaihtuah a. Taxi bik hi Bana Kaih-in huam lo mah se Commercial Passenger Vehicle dangah chuan a diltu ngei hminga State Transport Authority (STA) permit emaw licence emaw nei tawh te chu scheme hian a huam thei dawn thung, an ti a.

CM Special Package dilna Chief Minister Office-a dilna thehluh tura ruahman chu mipui remchan zawkna atan mahni district Deputy Commissioner-te hnenah pawh dilna thehluh thei tawh tura rel a ni.

Bana Kaih Scheme inkaihhraina bu Mizo tawnga lehlin chu thlirhoin pawm a ni a. Scheme vawrh lar dan tur chungchang sawiho a ni bawk.

<><><>

CIVIL AVIATION MINISTER

Civil Aviation Minister K Ram Mohan Naidu chuan New Delhi-a Rajiv Gandhi Bhawan-a Medical Inspection Room chu biak hmuhtheihna kaltlang-in a hawng.

Medical inspection room hian emergency pawh inring taka hmachhawn turin a in peih a. Pawl hrang hrang, Ministry of Civil Aviation, Indian Air Force, Central Industrial Security Force, leh private agency dangte thawktute hnenah a thlawna medical examination tanpuina pek an ni ang. Medical room-ah hian doctor's chamber, examination room, visitor area, leh nursing station te pawh siam a ni tawh bawk. Hnathawh ni zawng zawngah doctor leh nurse pakhat service theih a ni ang.

<><><>